

Pisortat ikiorsiissutaat pillugit Inatsisartut peqqussutaata allanngortinnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, anguniarlugu sapaatip akunnerini sisamani mattussisoqartalernissaa, qinnuteqartoq imaluunniit pisortat ikiorsiissutaannik aningaasartuutitut aalajangersimasunut kiisalu aningaasartuutitut ataasiartakkanut pisartagalik pisimappat tunngavissaqanngitsumik soorlu suliffissarsissussinerup itigartinneqarnera kingorna, suliffissarsissunneqarnerup kingorna suliertunngitsoortoqarsimappat imaluunniit suliffissarsissunneqartoq nammineq soraarsimappat imaluunniit suliffik tunniunneqartoq qimaannarneqarsimappat imaluunniit nammineq pisuussutiminik pisartagalik soraarsitaasimappat.

(Inatsisartunut ilaasortaq Andreas Uldum, Demokraatit).

Akissuteqaat

(Ilaqutariinnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut Demokraatit siunnersuuteqarnerannut qujapput.

Aallaqqaasiullugu erseqqissartariaqarpoq Naalakkersuisut isumaqatigilluinnarmassuk inuit sulisinnaassuseqartut nammineerlutik aningaasarsiortariaqarmata. Pisortanit ikiorsiissutit inunnut sulerusussuseqannginnerminnik pissuteqartumik suliassamut innersuunneqartumut naaggaartunut tunniussuunneqartariaqanngillat.

Naalakkersuisut pingaartilluinnarpaat suliassamik tigusinissamut piomassuseqartoqartarnissaa. Nalornissutigineqassanngilaq Naalakkersuisut kikkulluunniit allanit pilersorneqaannaratik nammineerlutik aningaasarsiorfeqarusuttut nammineerlutik aningaasarsiulernissaannut kaammattorusummatigit.

Maannakkut iluarsaaqqinnerit ingerlaneranni nammineerluni aningaasarsiulernissamut annertunerusumik piomassuseqarneq pingaarnepaavoq. Taamaattumik pineqartup sulisinnaassusiata iluaqutigineqarsinnaanerpaaffigisaanik pilerinartumik eqaatsumillu suliffeqartitsisinaanissaq Naalakkersuisut kissaatigaat.

Taamaammat isumaginninnermi malittarisassat suliffeqalernissamut kajumissuseqartuutitsiviusumik iluarsivigineqarnissaat Naalakkersuisut kissaatigalugulu takorluugaraat. Kikkulluunniit piginnaasatik nukissatillu naapertorlugit inuiaqatigiinnut iluaqutaassapput.

Pisortat ikiorsiissutaat pillugit Inatsisartut peqqussutaanni § 7 malillugu, kommune taamaallaat pisortat ikiorsiissutaannik tunniussisinnaavoq pilersuinissamut, aningaasartuutitut aalajangersimasunut ataasiaannartumilluunniit aningaasartuutissanut, piomasagaatit makku arlaat naammassineqarsimappat.

- 1) qinnuteqaateqartoq suliffeqanngippat aamma suliffissamik naammaginartumik neqeroorfigineqarsimanngippat kiisalu suliffigisinnaasaminik nammineq suliniuteqarluarluni ujaasippat.
- 2) naleqqusarnissamut ajornartorsiuteqarneq peqqiilliornerluunniit, imaluunniit
- 3) napparsimaneq erninermulluunniit atatillugu sulinngiffeqarneq pissutigalugit

sulisinnaangitsutut nalilerneqarpat, taamalu sulisinaanani.

Piumasaqaatit qulaani pineqartut inatsimmi maanna atuuttumi ilaareerput, tassa inunnut suliffissatut innersuunneqartumik tiguserusunngitsunut suliffigisinnaasaminillu nammineq suliniuteqarluni atorluaanngitsunut pisortatigoortumik ikiorsiisoqarsinnaanngilaq. Ilutigaluguttaaq inuit piffissap ilaani sulisinnaanngitsut sulisinnaaqqilernissaasa tungaanut, imaluunniit siusinaartumik pensionisiaqalernissaasa tungaanut pisortat ikiorsiissutaannik tunineqarsinnaanerit periarfissaavoq.

Inuk suliffissatut innersuunneqartumik naammaginartutut isigineqarsinnaasumik tiguserusunngitsoq, suliffimmi sulisinnaasutut isigineqarunnaassaaq, taamaammallu pilersuinissamut, aningaasartuutit aalajangersimasunut ataasiaannartumillu aningaasartuutissanut pisortat ikiorsiissutaannik pissarsinissamut pisinnaatitaaffeqarani. Tamanna aamma atuuppoq, pisortat ikiorsiissutaannik pissarsisartoq suliffissatut innersuunneqartumut takkutinngitsoorpat, suliffissatut innersuunneqartumit qimaguppat imaluunniit nammineq pissusilersuutai pissutaallutik suliffiup atorunnaarsinneqarneranut piussuteqarpat.

Siusinaartumik pensionisiat pillugit inatsit nutaaq suliarineqaleruttorpoq. Inatsimmik innuttaasut pineqartut suliffeqarnikkut aningaasaqarnermi iluaqutissartaasunik paasinnisnaaffigisaanik inatsiseqalernissaq aaqqissuusseqqinnermi pingaarnertut anguniagaassaaq. Inatsisikkuttaaq soorunami innuttaasut sulisinnaassutsip annikillineranik pissuteqartumik pisortanit pilersorneqarnissamik pisariaqartitsisut toqqissisimanartumik pilersorneqarnikkut tunngavissinneqarnissaat qulakkeerneqassaaq.

Taamatuttaaq Naalakkersuisut pisortanit ikiorsiissutit pillugit inatsit annertuumik iluarsateqqinneqarnissaat pilersaarusiortaat.

Iluarsaaqqinnikkut kissaatigineqarpoq ilaatigut sunniivigeqatigiinnikkut ajornartorsiutaasut suussusilersorneqarnissaat, pisortanit ikiorsiissutit tunniunneqartarnerannut piumasaqaatit misissorneqarnissaat aamma innuttaasoq sulumanngikkaangat qanoq kinguneqartitsisoqartassanersoq. Pisortanit ikiorsiissutit inunnut sulisinnaassusilinnut suliffimmik naleqquttumik neqeroorfigineqarnermut pinaasertunut tunniunneqartassanngillat. Tassunga atatillugu Naalakkersuisut aalajangiiffigisassatut siunnersuut una inatsisissatut siunnersuutip piareersarneqarneranut ilanngunniarpat.

Taamatut oqaaseqarlutik Naalakkersuisut inassutigaaq siunnersuut akuersissutigineqassanngitsoq.

Naalakkersuisut Inatsisartut pitsaasumik oqallinnissaat qilanaaraat.